

## Գեղադիր

**Մակերես՝** 12.24կմ<sup>2</sup>

**Բնակչություն՝** 649

Գյուղ Արագածի տարածատարածաշրջանում: Մարզկենտրոնից գտնվում է 59 կմ հեռավորության վրա: Նախկինում ունեցել է Գյոզալդարա, Գուզալդարա, Կյուզելտերե, Գյոզալդարա Հայի, Գյոզալդարա Ներքին անվանումները: Գեղադիր է վերանվանվել 1946 թ-ին: Նախկինում մտել է Երեւանի նահանգի Ալեքսանդրապոլի գավառի մեջ:

Ընկած է Արագած լեռնազանգվածի հյուսիսային լանջերին: Գյուղը գտնվում է ծովի մակարդակից 2025մ բարձրության վրա: Կլիման բարեխառն լեռնային է: Ձմեռները տեւական են, ցուրտ, հաստատուն ձնածածկույթով: Ամառները տաք են, համեմատաբար խոնավ: Հուլիսյան միջին ջերմաստիճանը տատանվում է 16-18-ի սահմաններում, հունվարյանը՝ -6,-8-ի սահմաններում: Մթնոլորտային տարեկան տեղումների քանակը 450-600 մմ: Բնական լանդշաֆտները սելահողային տափաստաններ են: 1831 թ-ին գյուղն ունեցել է 102, 1873 թ-ին՝ 368, 1914 թ-ին՝ 934, 1959 թ-ին՝ 535, 1979 թ-ին՝ 561 բնակիչ, որոնց նախնիները գաղթել են 1828-1829 թթ. Արեւմտյան Հայաստանից եւ Կարսի մարզից: Համայնքի բնակչությունը կազմում է 669 մարդ, որից 48% տղամարդիկ են, իսկ կանայք՝ 52%: Մինչաշխատունակ տարիքի բնակչությունը կազմում է 35%, աշխատունակ տարիքի ներկայացուցիչները՝ 48%, հետաշխատունակները՝ 17%: Գյուղն ունի 180 տնտեսություն: Ունի դպրոց, բուժկետ, կապի հանգույց:

Գյուղատնտեսական հողահանդակները օգտագործվում են հիմնականում որպես վարելահողեր, որտեղ զբաղվում են հացահատիկի, բանջարաբոստանային, կերային կուլտուրաների մշակությամբ: Տնամերձ հողերում կան բազմամյա տնկարկներ, մշակում են պտուղներ:

Պահուստային հողերը օգտագործվում են որպես վարելահողեր եւ արոտավայրեր՝ կազմելով համապատասխանաբար 50 հա և 338 հա:

Զբաղվում են հիմնականում մանր եւ խոշոր եղջերավոր անասնաբուծությամբ, թռչնաբուծությամբ: Արդյունաբերություն չունի:

Համայնքի հիմնախնդիրների մեջ կարեւորվում է խմելու ջրի ջրագծերի, գյուղամիջյան ճանապարհների վերանորոգումը: